

1 तिमोति

तिमोतिंकु पौलुसना मोदाटा सिट्टि

इस सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 64

इद सिट्टि पौलुस ओना मरिनसोंटा तिमोतिंकु रासतोर. इपीसि सहरते मनना विस्वासुल्कुन पेन हुपिस्ता हरदाल तप्सनाहाटी तप्पुड बोदा कराहनोर वेल्लेन लोकल्क तयार आतुर. अर्यते आ तप्पुड बोदानाल अगटा विस्वासुल्कुन बल्हा तपिच्चना, ओर्कुन विस्वासमते बल्हा गट्टिगा किय्याना, इंका ओर अंतोरतोनि बल्हा कलियसि-मेलियसि बक्तिते मनना. इसोंटव वेल्लेन पोल्लें पौलुस इद सिट्टिते रासि तिमोतिंकु हिम्मत हीतोर.

पेन उंदे आंद. इंका पेनदाल लक्कु आता अंतोर लोकुल्कुन मर्रा पेनतोनि कल्पानोरगुडा वरोरे आंदुर. ओरे मनकना रूपमते पुटता पेनदा मर्री येसु किरिस्तु. अंतोर लोकुल्कुना पापाल्क मापि आयनाहाटी येसु कुद्दु कुसुनपोर्रे ओना जीवातुन हीतोर. इचोने आयका अंतोर विस्वासुल्क वेंरेतोरतोनि बल्हा मान-मर्यादाते मनना, पेन हुपिस्ता हर्दे बल्हा ताकाना इल्हा वेल्लेन पोल्लें तिमोतिंकु इद सिट्टिते पौलुस रासि लोहतोर.

बगा बतल मंता

जोहार आनि परिचयम 1:1-2

कलिसिया आनि अगाटा अदिकाराल्कुना बारेमते समजांचि वेहामळ 1:3-3:16

तिमोतिंकु ओना कबाह्कुना बारेमते समजांचि वेहामळ 4:1-6:21

तिमोतिंकु पौलुसना जोहार

1 इद सिट्टि पौलसुनद आंद. मनम बोनपोर्री अये आसे पडसि मंतोम, आ किरिस्तु येसु आनि मनाकुन कापाळाना पेनदा आदेसताहेंदाल नना किरिस्तु येसुना प्रेरित* आतन.

2 विस्वासमते नावा निजम मरि आता तिमोतिकु इद सिट्टि रासतन. मना पेनबाबानाहेंदाल आनि मना सामि येसु किरिस्तुनहेंदाल नीकु कुर्पा, दया आनि सांति दोर्कि.

तप्पुड बोदानाल जेगर्ता मनना बारेमते

3 नना मेसिडोनिया राज्येम होननेके नीकु नना विनंति कीसि वेहतन. दाना परकारम निमे इपीसि सहरते मन्नु. निमे अगा मत्ते, बोर अये सत्तेमकु बदुल वेरे बोदां कराहंतुर, ओर्कुन अल्हा कराहकोटा आपा.

4 पुट्टिचि वेहना कतां, वंसाळकुना जोलीं ओर होळसियालय आदेस हीम. बारित्ते अबुनहेंदाल वाद-विवादकु आंतां विस्वासमहेंदाल जर्गना पेनदा पिलानगुडा पुरागा आयो.

5 ई आदेसता उद्देसम, पवित्र गुंडेताल, मनसुना बेस पोल्लेताल आनि निजम विस्वासमताल पुट्टना पावरम आंद.

6 इच्चुर लोकुलक इवनाल तप्पिसि वट्टि पोल्ले वळ्ळकालय दलगतुर.

7 ओर वेहना पोल्लेना अर्तम बतलो ओर्के तेळियाकोन्ना, गट्टि विस्वासमते ओर, मूसाना नियमालकुना गुस्लक आयाना इनकुंचंतुर.

8 मूसाना नियमकुने मत्ताप बरोबर ताकानय्ते, अद मंचिदे इंचि माकु एरपाटे.

9 इंका इव नियमकु नीतिमंतुलकुनाहाटीं रासमळ जर्गाहिल्ले. गानि अव अयेते, नियमकुन पीसि ताकवोराहाटीं, आदेसकुन पीसि ताकवोराहाटीं, बक्ति कियवोर आनि पापि लोकुलकुनाहाटीं, अपवित्र आनि सत्तेमते ताकवोराहाटीं, तल्लुर-बाबोन हळ्ळानोराहाटीं, मनकालोर्कुन हळ्ळानोराहाटीं,

10 बोगमतनम कियानोराहाटीं, मांडसा-मांडसातोनि बोगमतनम कियानोराहाटीं, मनकालोर्कुन दोर्कापीसि अम्मनोराहाटीं, आबद्दम वळ्ळानोराहाटीं, तप्पुड गवाइ वेहानोराहाटीं इंका सत्तेम पोल्लेन आबद्दम कियानोराहाटीं ई मूसाना नियमकु मंतां.

11 तलसकुननालायक पेनदाहेंदाल वाता महिमामय बेसता कबुरतुन नना कराहना इंचि नाकु अप्पजेपमळ जर्गता.

* 1:1 प्रेरित इद पोरोलक “पेन लोहचीतोर” इंचि अर्तम. येसु पन्नेड मंदितुन पेरकुत्तोर ओरे प्रेरितुलक आंदुर.

पौलसुनपोर्रो पेनदा दया मंता

12 मना सामि येसु किरिस्तु नाकु बलम हीतोर अदुनहाटी नना ओन्क दन्यवाद कीतन. इंका नाकुन विस्वासम लायकतोर इन्कुचि ओना सेवाताहाटी निलाहतोर.

13 मुन्ने नना बदनाम कियुंदुन, तकलिप हियुंदुन, तेंडसि पोहचि वळ्ळुंदुन. अयना नाकु सामिना दया दोर्कता, बारित्ते नना कियानद बतलो तेळियका, अविस्वासमते अल्हा कीतन.

14 मना सामिना कुर्पा नाकु वेल्लेन दोर्कता. अचोने आयका, येसु किरिस्तु ओनगा मनना विस्वासम आनि पावरमगुडा नाकु हीतोर.

15 पापिर्कुन पिसागोटनाहाटी येसु किरिस्तु इद दुनियाते वातोर. ई पोल्ले सल्लेम आनि पूरा ओप्कुननालायक मंता. अंतोर्कन्ना पेद्रु पापिन नना आंदुन.

16 अयनागानि येसु किरिस्तु नापोर्रो दया हुपिस्तोर. अल्हा दया हुपिच्चि, मुन्ने बोर अय्ते बस्केळ्ळक पिस्सना पिस्वर दोर्कना इंचि ओनपोर्रो विस्वासम कीतुरो, ओर्क ओना अंतेम हिलुवा सहनमतुन हुपिचनाहाटी उंदि उदाहरनता रूपमते नावसोटा पापिन इरतोर.

17 बस्केळ्ळक मनना राजाल, बस्केने नासडेम आयवोर, बस्केने दिस्सोर असोटा मावा उंदे पेनदुक पीळि-पीळिनदाका कदर, पेदातनम दोर्कि. आमीन.

तिमोतिना जिम्मेदारी

18-19 कोको तिमोति! पेनदा कबुरतोर नीवा बारेमते मुन्ने बव पोल्लें अय्ते वेह्चि मत्तुरो, आ पोल्लेना परकारम, निमे नीवा विस्वासमतुन गाट्टिगा पीसि, मनसुना बेस पोल्ले पीसि वरोर बेस सिपाइलेहका लडाइ कीसेके मनना इंचि नना नीकु आदेसतुन अप्पजेपसंतन. बारित्ते मनसुना पोल्लेतुन हय्सका वेल्लेन मंदि लोकुल्क, उंदि डोंगा रोंडु तुकडां आसोत्ताप, ओर ओरा विस्वासमतुन नासडेम कीकुत्तुर.

20 विस्वासमतुन नासडेम कीकुत्तोरव्टेटाल हुमिनयुस आनि सिकंदर ईर इव्वुर मंतुर. पेनदुन बदनाम कियाकौटा बल्हा मनना इत्ता पोल्ले करियना इंचि नना ईर्कुन देय्यम्क अप्पजेपतन.

2

मुर्ताह्क-मांडसताहाटी नियमकु

1 अन्निटकन्ना मुन्ने नना नीकु विनंति कीतन गदा, पेनदुक विनंति कियनेके, पारतना कियनेके, वरोनाहाटी वरोर पारतना कियनेके, दन्यवाद कियनेके अंठोर लोकराहाटी कियगोम.

2 मनम राजालोराहाटीं आनि पेद्दा-पेद्दा अदिकारिल्कुनाहाटीं पारतना कियगोम. अल्हा कीते मनम आरामते, सांतिते आनि पेनदुक नच्चना कदरगल्ला पिस्वर पिसा परांतोम.

3 इल्हा कियमळ मंचिद आंद. मनाकुन कापाळना पेनदा नदरतेगुडा इदे ओप्कुननालायक मंता.

4 लोकुलक अंटोर्कुंक मुक्ति दोर्कना आनि निजमतुन एपाट कियना इंचि पेनदा इच्चा मंता.

5 बारित्ते पेन उंदे आंद. इंका मनकन आनि पेनदुन कल्पालय नड्डुमगुडा वरोरे मंतोर. ओरगुडा वरोर मनकले. ओरे किरिस्तु येसु आंदुर.

6 अंठोर लोकुलकुंक मुक्ति अस्सि हियनाहाटीं ओर सततुन कुदुवा इरसि ओनद ओर अप्पजेपकुत्तोर. मंचि वेलापोर्री ओना गवाइ हीतोर.

7 इदे गवाइतुन वेहनाहाटीं, नाकुन प्रचार कियानोर प्रेरित इंचि पेरमळ जर्गता. इंका यहुदि आयवोर्कुंक विस्वासम आनि सत्तेमता बारेमते कराहनोर इंचि निलाहमळ जर्गता. नना निजम वेहचंतन, आबद्दम वेहासेक हिल्लेन.

8 अदुनहाटीं पारतना कियना अन्नि जेगाने मनसुने बतले होंगु-जगडम इर्काकोटा पवित्र कयकु पोर्री तेहचि मांडसा पारतना कियना इंचि नावा इच्चा मंता.

9-10 अल्हेने मुरताहकुना हेंदाल नना कोरानद बतल इत्ते, अव सादा-सिंपल कपडिं पोंडसि, साप मनसुने मनगोम. इंका बेस कबाहक कीसि पेनदा बेस बक्ति कियनावुनलेसीं मनगोम. गानि बंगाराल्क, डिस्को पूसाना दुम्मे वाटकुंचि, वेल्लेन दराता कपडिं केरसि, रका-रकाल्कुना जेडां वाटसि सिंगाराल्क अर्नायाओ. बारित्ते मुरताहकुंक अदे बेस.

11 मुरतळ सिराप सांतिते कय हिळु मंचि अन्नि करियगोम.

12 उंदि मुरतळ, मांडसक कराहमळ, ओनपोर्री अदिकारम ताकिचमळता बारेमते, नना ओप्कुन्नोन. मुरतळ सिराप चुपचाप मनगोम.

13 बारित्ते पेन मोदाला आदामुन कीसि पज्जोटाल हव्वान कीता.

14 इचोने आयका, आदाम पसांचा हिल्लोर गानि मुरतळ पसांचि पापमते अरता.

15 गानि अद ओक्कला विस्वासम, पावरम, पवित्र आनि ओप्केते पिलाल्क कंचेके तल्लुना जिम्मेदारि पूरा कियानयते, दानकु तप्पाकोटा मुक्ति दोर्कार.

3

कलिसियाता अदिकारिल्क बल्हा मनना?

1 ओक्कला बोरन्ना मनकल कलिसियाता पेद्दा मनकल आयना मनसु इरते, ओर तप्पाकोंटा बेस कबळ कियना इनकुंतोर, इत्ता पोल्ले मात्रम निजम आंद.

2 पजा आ पेद्दा मनकना पिस्वरते बतले दोसेम मननायो. ओर उंदे मुरतटा मुय्दो आयगोम, ओर ओप्के पीसि मनानोर आयगोम, ओर विचारम कीसि ताकानोर आयगोम, अंतोर ओना कदर कियनालायक ओर मनगोम, ओर वेरेतोर्कुन बेस हळकुनानोर आयगोम आनि वेरेतोर्क कराहनालायकगुडा मनगोम.

3 इंका ओर कल्लु उनानोर, मर्लाबळानोर, जगडम कियानोर मनामनि गानि मेत्तटा मनसुनोर मनगोम. ओन्क कोलतना लालच मनामनि.

4 ओर ओना सतता कुटुंब बारेमता अन्नि जिम्मेदारि बेस हळकुनानोर मनगोम, ओना मर्क-मियाहक ओना देकरेकते मंचेके ओना बेस कदर कियनोर मनगोम.

5 बारित्ते वरोर मनकंक ओना कुटुंबता देकरेक किय्युडे तेळियाकोंटे, ओर पेनदा कलिसियाता देकरेक बल्हा किया परांतोर?

6 इंका ओर पूनें-पूनें विस्वासमते वातोर आयामनि, बारित्ते असंटोंकु गरी वासि देय्यम्क दोर्कानसोंटा सिक्साता आदेस ओन्क दोर्कार.

7 इच्चोने आयका वेरे लोक्कुना विचाराल्कगुडा ओना बारेमते बेस मनगोम. अल्हा मनाकोंटे ओर सिग्गु पोळगोट्कुंचि देय्यमता कय्दुक दोर्का परांतोर.

कलिसियाता सेवक

8 कलिसियाता सेवाकुल्कगुडा अल्हेन कदरलायक मनना. ओर रोंड नाल्केनोर इत्ते चुगलीं कियानोर मनामनि, ओर्कु कल्लु उनना अलवट मनामनि, ओर तप्पु कबाहक कीसि संपादिंचनोर मनामनि.

9 ओर विस्वासम बारेमता मर्ममतुन मनसुना बेस पोल्ले वेहताप तेलिचकुंचि दान गट्टिगा पीसि मनानोर आयगोम.

10 ईरा गुनम बसंटदो तेळियनाहाटी ईरदगुडा परिक्सा येतगोम. परिक्साते ओरगा बतले दोसेम दोर्काकोंटे, ओर्कुन कलिसियाता सेवक इंचि कबळ किया हियना.

11 इल्हेने मुर्ताहकगुडा अंतोर कदर हियनलायक मनगोम. अवुनगा वेरेतोर्कुन अपमानम कियना गुनम मनामनि. गानि बेस ओप्केते अन्नि पोल्लेने विस्वासम कियनलायक अव मनगोम.

12 कलिसियाता सेवाकुंक उंदे मुत्तो मनगोम. ओर ओना सतता मर्क-मियाहक आनि ओना संसारमतुन बेस ताकसानोर आसि मनगोम.

13 बारित्ते बोर अय्ते सेवक इंचि कबळ कीतोर ओर बेस कदर दोर्किचकुना परांतोर. अचोने आयका किरिस्तु येसुना पोर्रो मनना ओना विस्वासमते ओन्क वेल्लेन दैरनेम दोर्कता.

मना विस्वासमता मर्मम

14-15 नाकु निहगा बिराना वायना आसे मंता. गानि ओक्कला नाकु वायालय आल्सेम आते, पेनदा कुटुंबते, इत्ते जीवाते मनना पेनदा कलिसियाते वरोर मनकल बल्हा मनगोम इत्ता पोल्ले नीकु एरपाट आयगोम इंचि इद सिट्टि रासेक मंतन. बारित्ते कलिसिया निजमता निटड गुंजा आनि पुनादि आंदु.

16 मना बकिता सत्तेमता मर्मम वेल्लेन पेदुदेद, इव्ते बतले अनमानम हिल्ले: किरिस्तु मनकना रूपमते पुटतोर, ओनगा बतले दोसेम हिल्ले इंचि पवित्र आत्मा वेहता, पेनदा दूतांक ओर दिसतोर, ओना बारेमते दुनियाता अन्नि देसेल्कुना लोकुल्कुंक प्रचार कियमळ जर्गता, दुनियातोर ओनपोर्रो विस्वासम इरतुर आनि पेनदा कदरते ओन मर्रा स्वर्गमते तेहामळ जर्गता.

4

तप्पुड बोदानाल जेगर्ता!

1 वायना रोजकुने, इच्चुर लोकुल्क दोका हियना आत्माना बोदां आनि देय्यमता पोल्ले केंजसि ओरा विस्वासमतुन होळसंतुर, इंचि पवित्र आत्मा किलियर वेहंता.

2 बोरा बोदां अय्ते काचाहता सलाकिते बोळिस हासोंचि मंतां, असोंटा दोका हियानोर आनि आबद्दम वळकना मनकालोराहेंदाल इल्हा जर्गता.

3 मरमिं आयामान्नि इंचि ओर कराहंतुर, इंका बव वस्तुक अय्ते पेन दाना विस्वास्कुनाहाटीं आनि निजमतुन एरपाट कियनोराहाटीं दान्क दन्यवाद हीसि तिनालय कीता, अव कोन्नि वस्तुकुन तिनामान्नि इंचि ओर कराहंतुर.

4 गानि पेन कीता अन्नि वस्तुक बेसतवे आंद. पेनदुक दन्यवाद कीसि तित्ते बवे वस्तुक मन्नि इननालायक मन्नों;

5 बारित्ते पेनदा पोल्ले आनि पारतना अद वस्तुन पवित्र कीता.

किरिस्तुना बेस सेवक आयगोम

6 ओक्कला निमे इव आदेसकुन विस्वासुलकुंक कराहनय्ते, निमे विस्वासम कियना बव पोल्लें आनि सत्तेम बोदानापोर्रो तांकतिनो अबुनहेंदाल बेरसता, येसु किरिस्तुना वरोर बेस सेवक आकिन.

7 बक्ति हिल्वव अल्हेन तयार कीसि वेहना कतानाल मंटु. बस्केळक बक्ति पिस्वरते मुन्नेळक ताकाना कोसिसते मंटु.

8 बारित्ते मेंदुलताहाटी कियना टेरनिंगते गोडच्चेन पायदा मंता. गानि पेनदा बक्ति कीते, अब्ते अन्नि तीरकुना पायदा मंता. इंदकेटा पिस्वर आनि मुन्नेटा पिस्वरहाटी पेन हीता पोल्ले अब्ते कलियसि मंता.

9 ई पोल्ले पुरागा ओप्कुननालायक आनि विस्वासम कियनलायक मंता.

10 इदुनाहाटीगें मनम बागा कस्टपळसेके, पोराटम कीसेके मुन्नेळक ताकसेके मंतोम. बारित्ते मनम मना आसे, बस्केळक जीवाते मननद आनि अंटोर लोकुल्लुकुन कापाळना पेनदापोर्रो इरतोम, विसेस कीसि दान विस्वासम कियानोर्कुन पिसागोटना पेनदापोर्रो इरतोम.

11 इवे पोल्लें कियालय आदेस हीसि अंटोर्क करहा.

12 नीवा लेय्यातनमहेंदाल बोर नीकुन सिन्नगा हळानायो. गानि वळकुमळते, ताकमळते, पावरम हप्समळते, विस्वासमते, पवित्र मनमळते विस्वासुल्लक नीकुन हळसि करियगोम, अल्हा मन्नु.

13 नना बदवेरदाका अय्ते वायोनो अदवेरदाका निमे अंटोर नड्डुम दर्मसास्त्रमतुन हदवुसेके, प्रचार कीसेके, कराहसेके मन्नु.

14 पेद्दाल्लक नीपोर्रो कय्क इर्सि पारतना कियनैके, बविस्ववानि कियानोर वेहता आ वरम नीकु दोर्कता. अद वरमतुन निमे वाळकुन, दान मति मर्गुमा.

15 इवे पोल्लेन निमे नीवा मनसुने इर्सि अबुना परकारमे ताकसेक मन. अस्के निमे बक्तिते बेस बेर्सनद अंटोर लोकुल्लकुंक दिस अर्रता.

16 निमे नीवा पिस्वर बारेमते आनि निमे वेहना पोल्लेन बारेमते वेल्ले जेर्गताते मन. अल्हा मत्तिनित्ते, नीवद निमे कापाळकुंतिन, नीवा पोल्लें केंजानोर्कुनगुडा कापाळंतिन.

5

बोनतोनि बल्हा वळकना बारेमते कोन्नि पोल्लें

1 पेद्दा वयम मनकन तेराहताप वळकुमा, गानि ओन नीवा बाबाल इन्कुंचि ओन्क तेल्लिचि वेहा. सिन्नोर्कुन तम्मुर इन्कुंचि ओरतोनि व्यवहार कीम.

2 अल्हेने पेद्दा वयम मुर्ताहकुन यावहक इन्कुंचि आनि सिन्ना वयम मुर्ताहकुन हेलाहक इन्कुंचि पुरागा पवित्र मंचेके अवुंक तेल्लिचि वेहा.

3 बव मुर्ताहक अय्ते निजम मुंडामोसि मंतां, अवुना निमे कदर कीम.

4 ओक्कला बद्दना मुंडामोस्ता मुरतळकु मर्क-मियाहक आयि, तंगमर्क-मियाहकगिटा मत्ते, मोदाला ओर बेस बक्विते ताकसेके सतता कुटुंबतुन पोस कियमळ करियगोम. पजा सतता तल्लुर-बाबो ओराहाटीं कीता मंचितनमता स्नम तिरिचनाहाटीं, ओर्क मंचितनमतुन मलाहचि हियगोम. बारित्ते इल्हा कियमळ पेनदुक नच्चनालायक मंता.

5 बद मुरतळ अय्ते निजमते मुंडामोसि, बोरे दिक्कु हिलाका उंदे मनंता, अद मुरतळ दाना आसे पेनदापोर्रो ईर्सि, नर्का-पल्ही पेनदुक विनंति, पारतनां कीसेके मनंता.

6 गानि बद मुरतळ अय्ते सिराप सुकमता आसेते पिसंता, अद मुरतळ पिस्सि मंचिगुडा हाता लेक्कातेन वांता.

7 इंचि बोरे तप्पुने दोर्काकोटा मननाहाटीं, इव पोल्लेना बारेमतेगुडा अंतोर विस्वासुल्कुंक आदेस हीम.

8 ओक्कला बोरन्ना ओना हेडमितोर्कुन बेस हळकुनाकोटे, विसेस कीसि सतता लोतोर्कुन बेस हळकुनाकोटे, ओर विस्वासमता कदर कियवोर आंतोर. अचोने आयका विस्वासम कियवोंकन्ना एक्को कराब मनकना लेक्काते वांतोर.

9 मुंडामोस्ता मुरतटा वय्सु अरवै वर्साकन्ना तक्को मनानय्ते, आ मुरतटा पोरोल मुंडामोस्ता मुरताहकुना रजिस्टरते रासानायो. अचोने आयका आ मुरतळ मुन्ने वरोने मुय्दोन मरमिं आसि मत्तद आयगोम.

10 इंका अद मुरतळ बेस कबाहकुने बेस पोरोल तरकुंचि मनगोम, मर्क-मियाहकुन पोस कीतद आयगोम, वाता हेळमितोरा सेवा कीतद आयगोम, पवित्र लोक्कुलकुना काल्क नोरतद आयगोम, तकलिपने मतोर्कुंक सहायम कीतद आयगोम इंका अन्नि परिस्तितीने बेस कबाहक कियालय अप्पजेपतद आयगोम.

11 गानि लेय्यातनमते मुंडामोस्ता मुरताहकुना पोरोल अद रजिस्टरते रासमा. बारित्ते बस्के अय्ते अवुना मेंदुलता इच्चां एक्को आसि, किरिस्तुनापोर्रोटा विस्वासम तक्को आंता, अस्के अवुंक मरमिं आयाना इच्चा आंता.

12 इल्हा अव अवुना मोदाटा निरनायमताल तपिच्कुंचि सिक्साता आदेस तरकुंतां.

13 अचोने आयका लोन-लोन तिरियना अलवट अर्षि लंडुंक हेडंतां. सिराप लंडुंक हेळमळे आयो, गानि हेकेटां-हीकेटां जोलीं केंजंतां, वैरेतोर कबाहकुने कय कुच्चंतां, बव पोल्ले अयते अव वळकना आयोनो, असोटा पोल्ले वळकालय दल्यांतां.

14 अदुनहाटीं लेय्यातनमते मुंडामोस्ता मुर्ताहक मरमिं आसि, पिलाल्कुन कंचेके संसारम कियना इंचि नावा इच्चा मंता. अल्हा कीते पगातोरुंक तप्पुक दोसना मोका दोर्की.

15 नना इल्हा वेहना कारनम बतल इत्ते, कोन्नि मुर्ताहक हर्रि तप्सि देय्यम हरदे ताकसंतां.

16 बदन्ना विस्वासि मुरतटा लोन ओक्कला मुंडामोस्ता मुर्ताहक मत्ते, अवुंक आ लोता विस्वासि मुरतळे कुद्दु सहायम कियगोम, अवुना मोता कलिसियातोरपोर्रो वाटानायो. अस्के निजमते मुंडामोसि मत्ता मुरताहकुंक कलिसिया सहायम कियगोम.

17 कलिसिया ताकसानोरवेटाल बोर अयते बेस कलिसिया ताकसंतोरो, ओन्क वेल्ले कदर हियगोम. विसेस कीसि बोर अयते प्रचार कियालय, कराहलय कस्टपळंतोरो ओन्क रौड अंताल्क कदर दोर्कुगोम.

18 बारित्ते, “बंति तिराहनेके कौदाता मुस्किरकु मूस्का बुट्टि दोहामन्नि,”✠ आनि “बूतिगानकु बूति दोर्कना,”✠ इंचि दर्मसास्त्रम वेहंता.

19 कलिसिया ताकसाना पेद्दा मनकना पोरो बोरन्ना दोसेम दोसते, इव्वुर-मुव्वुरन्ना गवाइदार्क हिल्वद निमे अद दोसेमतुन नम्मुमा.

20 बस्केळ्ळ पापम कीसेक मनानोन अंतोरा मुन्ने तेरहा. अस्के कळमातोर अल्हा कियाकौटा वेंते मनांतुर.

21 पेन, किरिस्तु येसु आनि पेन पेरता पेनदा दूतन मुन्ने इर्षि नना नीकु गट्टिगा आदेस हीसेक गदा, बदे उंदि बाजुन पियाकौटा, सिन्ना-पेद्दा इनाकौटा निमे इव नियमकुन पीसि ताका.

22 कलिसियाता पेद्दा मनकल इंचि निलाहनाहाटीं, बोन पोर्रेन गाबर आसि कय इरमा. वैरेतोर पापाल्कुने निमे पालिगाड आयमा. इंका नीवद निमे बस्केळ्ळ पवित्र ईर्कुन.

23 सिराप ऐ उंचेके मन्मा, नीवा पीर साप मननाहाटीं, इंका वेरे बिमार्क ऊके-ऊके वायाकौटा मननाहाटीं, अस्के-अस्के अंगुर पानकम उंचेके होन.

24 कोन्नि लोकल्लुकुना पापाल्क बय्यर दिस अर्रीतां, न्यायम जर्गनाहाटीं अवुन मुन्ने तरांतुर. गानि कोन्नि लोकल्लुकुना पापाल्क मात्रम पज्जोताल दिस अर्रीतां.

25 इल्हेने बेस कबाह्कगुडा बय्यर दिस अर्रीतां, बव बेस कबाह्क दिस अर्रीगों, अवगुडा वेल्ले रोजकु मक्किस मन्नो.

6

दासल्लुकुनाहाटीं कोन्नि नियम्कु

1 बोर अय्ते दासि कबळ कीसेके मंतुरो, ओर अंतोर ओरा मालकुल्लुकुन अन्नि तीरकुना मान-मर्यादालायक इनकुनगोम. अस्केने पेनदा पोरोल आनि कराहता पोल्ले बदनाम आयाकोंटा मनंता.

2 इंका बोर दासल्लुकुना मालकुल्लुक अय्ते विस्वासमते मंतुर, आ दासल्लुक ओरा मालकुल्लुकुन, ‘ईर मना विस्वासि आंदुर’ इंचि ओन सिन्नगा ह्ळानायो. मीवा सेवाता पायदा येतानोरगुडा मीवसोंटा पावरमगल्ला विस्वासल्लुक आंदुर. इंचि ओरद इंका एक्को सेवा कियना. इसोंटव पोल्लें निमे ओर्क कराहचि गट्टि दैरनेम हीम.

आबद्दम बोदा आनि निजम दनमता आस्ति

3 इंका ओक्कला बोरन्ना ई पोल्लें तप्पा वेरे कराहनय्ते, अचोने आयाका मना सामि येसु किरिस्तुना निजम पोल्लेन पियाकोंटा, ओर वेहता बक्तितुन ओप्कुनाकोंटे,

4 ओर इरगा गरति निडिस मंतोर, ओन्क बतले तेळियो. असंतोर लोल्लिं आनि पोल्लेन पीसि जगडाल्क कियना बिमार आसि मंतोर. दीनहेंदाल अय्ते कळ्ळ पोतमळ, जगडम, अपमानम, कराब अनमानाल्क तयार आंता.

5 आनि इसोंटोरा नड्डुम बस्केळ्ळ लोल्लिं-जगडाल्क आसेकेन मनंता. इंका इसंतोरा बुद्धि हेळसोंचि, ओर निजमताल लक्कु आतोर आंद. अदुनहाटीं ओर पेनदा बक्तितुन कमाइ कियना उंदि हर्रि इनकुंतुर.

6 पेनदा बक्ति समादानमते कियमळे पेद्दा दनम आंद.

7 बारित्ते मनम ई दुनियाते वायनेके बतल तरा हिल्लोम, इगोटाल होननेकेगुडा बतले ओया परोम.

8 अदुनहाटीं मनगा तिनालय तिडि, केरालय कपडिं मत्ते, अव्टेन मनम समादानम मनना.

9 गानि सिरमंत आंतोम इनकुनना लोकलुक कतरनाक परिकसाने, उरिने, अवसरम हिल्वव वेल्लेन नुकसान कियनसोंटा इच्चाने हिरकंतुर. असोंटा इच्चा मनकालोर्कुन हेळाहचि नासडेम कीतां.

10 बारिते कोतन पोरोटा पावरम, अन्नि रकालुकुना सेड्डातनालुकुंक हर्रि पुट्टिचंता. बचुद्रो लोकलुक ओरा इच्चान दोर्किचुकुननाहाटीं विस्वासमताल तप्सोतुर आनि ओरा पिस्वरते वेल्लेन दुक्कमतुन संपादिचुकुंतुर.

तिमोतिकु पौलुसना आकिर आदेसकु

11 गानि निमे पेनदा बक्ति कियाना मनकन आंदिन. इव अन्नि सेड्डातनालुकुनाल लक्कु मंचेके नीतिते, बक्तिते, विस्वासमते, पावरमते, दैरनेमते आनि सादा-सिंपल पज्जो ताका.

12 नीवा विस्वासमतुन दक्किचुकुनालय बेस लडाइ कीसेके मन्नु, बस्केळक पिस्सना पिस्वरतुन गट्टिगा पीसि ताका, इद पिस्वरहाटीगे नीकुन केयमळ जर्गता. ई मंचि पोल्लेतुन निमे वेल्लेन मंदि गवाइदार्कुना मुन्ने ओप्कुत्तिन.

13-14 अन्निटवुन जीवाते ईर्ना पेनदा मुन्ने आनि पुंतुस पिलातुसना मुन्ने बेस गवाइ हीता किरिस्तु येसुना मुन्ने, नना नीकु आदेस हीसेक गदा, मना सामि येसु किरिस्तु मरा वायनदाका, निमे ई आदेसतुन बदे तप्पु डागु आनि दोसेम अंटाकोंटा कापाळसेके ईर्ना.

15 राजुलुकुना राजु, सामिलुकुना सामि, अन्निनपोर्रो अदिकारम ईर्ना आ आसिर्वाद दोर्कता, बरोबर वेलाकु ओन मनाकु हृप्संतोर.

16 ओन्क बस्केने हामुर हिल्ले. मनम बोरे होना पर्रोम असोंटा वेल्गुने ओर मनंतोर. ओन इदवेरादाका बोरे हळा हिल्लुर, बस्केने हळा पस्सरुडा. अंटावुकन्ना बलमाता आ पेनदुके बस्केळक कदर दोर्कि. आमीन.

17 ई दुनियाते मनना सिरमंत लोकलुक, गर्ग कियामन्नि. नासडेम आसि होनना दनम पोरो आसे ईर्कोंटा, जीवाते मनना पेनदापोर्रो विस्वासम ईर्ना. आ पेने मना आनंदमहाटी गावाले मत्तव आ अन्नि बेसतवुन इरगा हीता, इंचि ओर्क आदेस हीम.

18 इचोने आयका इंका ओर्क आदेस हीम गदा, ओर बेस कबाहक कीसेक मनना, बेस कबाहक कीसे सिरमंत आयाना. मनागा मत्तदुनाल अवसरम मत्तोंक, पंचि हियालय बस्केळक मनसुनाल तयार मनगोम.

19 इल्हा कीसेके मत्ते, मुन्नेटा पिस्वरहाटी ओर उंदि बेस पुनादि तयार कीकुंतुर, आनि बस्केळक पिस्सना पिस्वर पिस्सेक मनंतुर.

20 तिमोति, नीकु अप्पजेपतदुन निमे कापाळकुन. बक्ति हिल्वा कराब पोल्लेनाल लक्कु मन. इंका इदे “निजम तेल्वि” इंचि वेहना आबद्दम कतानाल लक्कु मन.

21 इच्चुर लोक्कुलक असोंटा पोल्लेन नम्मिसि विस्वासमताल तप्सोत्तुर. पेनदा कुर्पा बस्केळक नीतोनि मन्निकांटी.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068